

Áchtopa ama' yej San Pablo kijekuilowilij Timoteo

Pablo kijekuilowiliá Timoteo

¹ Nej niPablo, iyapóstol* Jesucristo, ken tikijtowaj, se yej yéj kititan, iga ijkón kine' Dios yej tesalvarowa iwán toTeko Jesucristo, yej ípansan wel timoconfiarowaj. ² Timoteo, tej yej ken tinomela'piltzín iga nimitznex-tilij iga ximoconfiaro ipan Cristo, nimitzijkuilowiliá inín ama'. Nikneki iga Dios yej toTaj iwán toTeko Cristo Jesús, mamitzjolchikawa, mamitzikneli iwán makichiwa iga xono tamelá.

Pablo kinonotza Timoteo iga sekin yej ayompa tamachtiáj

³ Ken nimitzijlijté' kuá' nikisa' iga niajki estado de Macedonia iga xikawi altepe' Éfeso, iga xikijlikan yej ayompa tamachtiáj iga ay' máj ijkón makichiwakan. ⁴ Niga nō makinagasmakakan cuento yej motenchíwapa, niga makiyoltilantokan iga makimatikan itokamej to-ikyapatajwan. Inón tachiwaltiá iga mamokuejkuesolo iwán ayá' tepalewiá iga tikchiwaj ken Dios kineki, inón welsan tikchiwaj iga timoconfiarowaj ipan.

⁵ Nimitztajtaniá iga xitanextili iga mamomela'sepanchokilikan. Petz yejsan kimatitokej iga kichiwaj yej yekti iwán momela'confiarowaj pan Dios, wel ijkón mochokil-iáj. ⁶ Sekin kikajtéjkeja nochi inín wan mopojpolójkeja ipan xeto'tajtolmej. ⁷ Kinekij matamachtikan ipan iley Dios, e' niga yejemej ayá' kimatij te kijojneki yej kijtowaj, niga yej tanextiliáj.

* 1:1 1:1 Xikita glosario "Apóstol".

⁸ Tikmatij iga la ley yekti, e' siga tikentenderowaj tejas iga mo-ijkuijoj. ⁹ Matikmatikan iga la ley ayá' ono' iga yej ye'nemij, sino iga inomej yej yoltakuaktikej iwán yej ayá' tacredowaj, iga yej pox kichiway yej ayekti, iga yej ayá' kitajtolkuij Dios iwán kimalijliáj, yej kimiktiá itaj iwán iye', iwán inochi yej tamiktiáj, ¹⁰ iwán iga yej mosenteka iwán yej ayá' iwán namiktito' o moteka iwansan itaga-iknin, iga yej kichteki se toknin iwán kitajtani tomin iga maki-majkawa, iga yej tayokakajkawawaj iwán iga yej kjtowaj "kitzto' Padre", malej iga kimatij iga nemi takajkawawaj. La ley no ono' iga nochi yej ayá' kichiway ken tanextiliá itájtol Dios. ¹¹ Inín itájtol Dios inonya ye'noticiaj yej tamánawiá yej Dios netekimá' iga manikpowa.

Pablo kimaka gracias Dios

¹² Nikmaka gracias toTeko Jesucristo iga neye'ita' iga manikchiwa itekipánol. ¹³ Malej iga nej ikya nimaltajtowaya de Cristo, iwán kuajkuantas nikijliaya yej kitokaj Cristo, nikpresojwiayaj iwán nikiknochiwayaj; e' Dios nechokilij iga aya nikmatia te nikchiwaya iga aya nicredowaya ipan Cristo. ¹⁴ Dios poxsan ne-iknelij iwán nepalewij iga manimoconfiaro ipan Cristo Jesús wan manikneki tokniwan.

¹⁵ Inín yej nia nimitzijlitij ijkonya nokta iwán kajasi iga inochi gente makicredo: Jesucristo walaj ipan inín tajli iga kimanawiko yej ayompa nemij, e' nejwa' in yej máj ayompa ninemiá. ¹⁶ E' Dios nechokilij iga ipan nej, yej máj ayompa ninemiá, monextia iga Jesucristo ayá' nimanín kuesiwi'. Iwán ijkón iga mamixkuitikan ipan nej iwán no mamocfiarokan ipan Jesucristo, ijkón wel nochipa onoskej itenoj Dios. ¹⁷ Inón iga mamoweyimatilti toDios yej nochipa mandarowa, yej nikeman ayá' miki,

vej atikitaj iwán yéjsan iselti Dios vej nochi nokta kimati. Ijkónyawa'.

¹⁸ Timoteo vej ken tinopiltzín, nimitztekimaka iga xikchiwa ken kijtojkej toknimej vej Dios kitajtólma' iga tej. Siga ijkón tikchiwas, tonos ken se soldado vej ayá' mosemaka pan itekipánol. ¹⁹ Amo xikajtewa iga ximofiaro ipan Dios, xikchiwa vej yekti ken mitznextiliá moalmaj. Sekin iga ayá' kichijkej vej yekti ken kimatitoyaj ipan iyalmajmej, kikajtejkej iga moconfiarojkej ipan Dios. ²⁰ Ijkón kichijkej Himeneo iwán Alejandro, vej niktitan ipan ima' Tzitzimi' iga makichiwilikán ken yéj kineki iga makimatikan iga ayekti iga makimalijlikán Dios.

2

Ken iga mamotenewi Dios

¹ Inín vej máj nikneki mamochiwa, nochipa mamotajtanili Dios iga tamelá maonolo, iwán mamomaka gracias Dios. ² Matiktajtanilikán Dios iga inochi reyejmej iwán inochi tekiwajmej, iga matonokán tamelá iwán wel matiye'nemikan iyixtaj Dios iwán wel mateye'ita. ³ Pox yekti iga ijkín tiktenewiáj Dios, inón kipoxye'ita Dios vej temánawia, ⁴ iga yéj kineki iga nochi mamomanawikan iwán makimela'matikan vej melá' nokta. ⁵ Ono' sesan Dios, iwán ono' sesan vej wel tetajtowiliá itenoj Dios: inónwa' Jesucristo vej taga' ⁶ vej motemá' iga mi' iga nochi toknimej wel mamosalvaro, inín momatiko kua' nokta Dios kine'. ⁷ Ijkón iga Dios netapejpen iga nikpowa' itájtól, iga inón nokta netitankej iga manikmachtikan vej ayéj judiyojmej iga nō mamofiarokán ipan vej melá' nokta. Ayá' nitakajkayawa, nikijtowa vej cierto.

⁸ Nikneki iga noyan kan motenewiá Dios, tajtaga' vej ye'nemij makajkokuikan imamej, amo makuesitokán

iwán amo agaj íwán mamokuejkuesojtokan. ⁹ Iwán siwatkej iga manesi iga ye'nemij, amo makakikan wípil yej akajasi iga makakikan yej kitokaj toTeko. Amo mamotzi-jtzikuikan kansan póxsanya iga maye'nesikan, iwán amo makitalikan yej xojxota, ken oro niga perla,* ¹⁰ sino que siwatkej makichiwakan yej yekti iga manesi iga ye'nemij ken kineki Dios. ¹¹ Kuá' taga' tamachtiá ipan itájtól Dios, siwa' amo matajto, wan matacredo. ¹² Ayá' nikneki iga siwa' matamachti, niga makimandaro taga'. Sino que san matakakto. ¹³ Iga Dios achto kichij Adán iwán después kichij Eva. ¹⁴ Iwán ayéj Adán yej kikajkayajkej, Évajwa' in yej kikajkayajkej, iwán kichij yej ayekti.† ¹⁵ E' siwa' momanawij siga kiyé'iskaltía ipilowan, siga moconfiarowa ipan Dios, siga te-ijiknin, siga ye'nemi iyixtaj Dios iwán ayá' kichiwa yej ayekti.

3

Ken iga manemikan pastormej

¹ Siga se taga' mochiwasneki pastor,* inón kena kichiwasneki ye'tekipánol. ² Yej óno'ya iga pastor maye'nemi iga ijkón awel kipopowaj, makipiá sesan isiwa', nochipa makichiwa yej yekti, maye'tajlanto, makiye'itakan, nochipa ichan maki-omemawi paxalowanimej iwán wel matamachti ipan itájtól Dios. ³ Amo matawana, niga matakuejkueso, niga makineki tomin yej ayompa motaniá, majwa' mate-ijiknin, iwán mayoltzopeli' iwán amo makipoxpiasneki tomin. ⁴ Wel makichiwa iga maye'nemikan nochi yej onokej ichan; ipilowan matacredokan iwán matamajmawilikan.

* 2:9 2:9 Perla pox valerowa, ken tikita tetzin ke'pa ajayo' wan iga perla wel mochiwa koska'. † 2:14 2:14 Gn 3:1-6 * 3:1 3:1 Pastor: xikita glosario "Obispo".

⁵ Siga awel kichiwa iga maye'nemikan isiwa' iwán ipilowan, ¿kén wel kichiwas iga maye'nemikan yej yéjpa kicuidarowa, yej kitokaj Dios? ⁶ Awel mochiwas pastor yej kicrédojo' Dios, amo santá' moweyimatis iwán yati kan tawewelkato' kan yati Tzitzimi'. ⁷ No se yej mochiwasneki pastor, maye'tajtokan iga yéj ken iga nemi. Maye'tajtokan no iga yéj yej ayá' kitokaj toTeko iga amo agaj makipopowa, iwán amo mamokxipolo ipan iyojwi toTeko ken kichiwaltijneki Tzitzimi'.

Ken manemikan diaconojmej

⁸ Ijkonsan no diaconojmej† makiye'itakan; amo matakajkawakan, amo matawanakan, amo makinekikan tachte'tomin. ⁹ Makichitokan ken kijtowa itájtol Dios, iwán makimatitokan ipan iyalmajmej iga ayo' kichijtokej yej ayekti. ¹⁰ Achto mamó-ita siga ye'nemij, ijkón wel mochiwaskej diácono siga kiye'itaj. ¹¹ Ijkonsan no siwatkej maye'nemikan iga makiye'itakan, amo matapopowakan, iwán amo makichiwakan yej ayekti siga ijkón kineki iyalmajmej iwán nochipa matawelnemikan. ¹² Diaconojmej makipiakan sesan isiwamej, iwán wel makichiwa iga maye'nemikan ipilowan iwán nochi yej ono' ichamej. ¹³ Iga diaconojmej yej kiye'chijaw itekipánol, ye'tajtoskej iga yejemej, iwán sekin máj wel kitajtolkakiskej kua' kipowaskej ken iga moconfiarowaj ipan Cristo Jesús.

¹⁴ Nimitzijkuilowiliá inín ama'; e' ayá' wejkatis niaj nimitzitati ¹⁵ e' siga awel nimanín nimitzpxalowilíti, inán tikmátiya ken iga matiye'nemikan tejemej yej ipilowan Dios yej isato'; ken tikijtowaj, nochi yej tiktokaj Dios. Tejemen tikijtowaj iwán tikmanawíaj yej melá' nokta.

† 3:8 3:8 Xikita glosario “Diácono wan diaconisa”.

Ken mochiij kua' onokoya Jesús

¹⁶ Tikmela'matij iga inín yej aya momatiá, yej ticredowaj pox yekti:

Dios walaj ken se taga';

IyEspíritoj Dios kinojma-ijtoj iga ayí' kichij yej ayekti,

iwán angelejmej[‡] kitakej,

iwán noyan ipan paismej mopowa',

iwán noyan ipan inín tajli kicredojkej,

iwán tejkaj sej ipan cielo.

4

Yej yawij kikajtewatij iga moconfiarowaj ipan Dios

¹ IyEspíritoj Dios kinojma-ijtowa iga kua' ay'ya wejka iga wí' toTeko, sekin yawij kikajtewatij iga kitokaj Dios, iwán kitokaskej malespíritojmej yej takajkayawaj wan yej tamachtíaj ken Tzitzimi' kineki. ² Kitajtolkuiskej yej nésiki' kitokaj Dios, siempa nemi takajkayawaj, este ay'ya momachiliáj ipan iyalmajmej iga ayompa nemij.

³ Yejemen tamachtiskej iga ayéktiki' mamonamiktilo, iwán ay'yaki' mamokua sekin tákual. E' Dios kichij nochi yej wel mokua, iwán matikmakakan gracias iga inón tákual tonochin yej timoconfiarowaj ipan yéj, wan tikixmatij kén nokta tamachtía itájtól. ⁴ Iga nochi yej Dios kichij yekti iwán awel tikijtoskej iga ayekti, sino que wel tikuj, e' achto matikmakakan gracias Dios. ⁵ Iga yej Dios kijtoj iwán iga tikmakaj gracias Dios, yéktiya iga mokua.

Pablo kinonotza Timoteo

⁶ Siga inín tiknextiliá toknimej, tiye'tekipanoj iga Jesucristo, siga timomachtía wan tikchiwa ken kijtowa ye'tájtól, inón kenkua' tiye'takua. ⁷ Amo xiknakasmaka xeto'tatapowalis yej tága'pa kijtowa. Majwa' xikchijto ken

[‡] 3:16 3:16 Xikita glosario "Ángel".

Dios kineki. ⁸ Yekti iga xikchiwa ejercicio, e' máj yekti iga xikchijto ken Dios kineki, inón mitzpalewiá ipan inín tajli iwán nō kua' tonos kan ono' Dios. ⁹ Inín sí ijkonya nokta, iwán yekti iga inochi makicredo. ¹⁰ Inón iga anisiawij iga titekipanowaj wan te-iknochiwaj iga timoconfiarowaj ipan Dios yej isato' yej kisalvarowa nochi gente, e' máj kisalvarowa yej kicredowaj ípan.

¹¹ Xitanextili inín yej nimitzijlij iwán xitatekimaka iga mamochiwa. ¹² Amo agaj mamitzalimpamati iga aya tiy-olej; majwa' wel ipan tej mamixkuítikan ken iga titajtowa, ken iga tinemi, ken iga tite-ijiknín, tiyolyamani', ken iga timoconfiarowa pan Dios wan iga ateyi nité yej ayekti ipan moalmaj. ¹³ Mij násiso' ompiga, xikleerowilijto itájtōl Dios tokniwan, xiknonotzakān iwán xikmachtikan. ¹⁴ Amo xikelkawa iga pastormeij mitztalilijkej imamej pan motzontekon kua' Dios kitajtōlmakakej, iwán kijtojkej iga Dios mitzpalewiá iga xikchiwa motekipānōl.

¹⁵ Nochipa xikchijto yej nimitzijliá, iga nochi makita iga tikchijtiá ken Dios kineki. ¹⁶ Xikita ken iga tinemi iwán ken iga titamachtiá, iwán ijkón xikchijto, siga ijkón tikchiwa, timomanawij, iwán nō momanawiskej yej mitzkakiskej.

5

Kén iga se maye'nemi iyixtaj tokniwan

¹ Se totajwéj yej kicredowa Cristo, siga ayompa kichiwa, amo xikajajwa; majwa' xiknonotza ken tikchiwaya siga tiknonotzaya motaj, iwán chokomej xikita ken mokniwan.

² Toy'elamatkej xikita ken moye', iwán takomej ken tikita mosiwa-ikniwan, amo xikejlamikili yej ayekti.

³ Xikpalewi siwá' yej mi'ya iwéj, yej ayagaj kipalewiá.

⁴ E' siga se yej wewejmi'ya, kipiá ipilowan o inietojmej, inimej achto yej makipalewikan iyemej, iga ijkón kenkua'

kikuepaj iga moskaltijkej, ijkón yekti iwán kiye'ita Dios. ⁵ E' yej mi'ya iwéj, iwán káwi'ya nokta iselti, inón kisen-taliá iyalmaj ipan Dios, semilwi' wan tayowakan kitenewiá Dios. ⁶ E' yej mi'ya iwéj iwán moyolpolojto' ipan yej kuajkuantas yejsan kineki iyalmaj, inonwa' kenkuá' mik-to' malej iga isato'. ⁷ Inón iga xitanonotza ipan inimej yej nimitzijlij iga amo agaj makipopowakan. ⁸ Si agaj ayá' kipalewiá yej de ifamíliajpa, inón ayá' nemi kichiwa ken kijtowa Dios, iwán mochiwa majya sej que yej ayá' kicredojo' Dios.

⁹ Xikijkuilokan ipan ama' itokamej yej mi'ya iwéj, yejsan kipiá sesenta iyañoj o máj, iwán yej sesan iwéj kipiá'.* ¹⁰ Yej momati iga kichij yej yekti, kiye'iskaltij ipilowan, komemawij ichan yej kipaxalowiliáj, kijikxipaga' toknimej yej kicredojo' Dios, kiyolchikaj yej mokno-matij iwán kiyolmá' iga kichij nochi yej yekti.

¹¹ E' yej mi'ya iwéj yej aya kipiá inín edad, amo xikijkuilo itoka', amo santá' ipan iyalmaj kinekis sej mamonamikti, wan ijkón kelkawas iga kitoka Cristo, ¹² iwán ijkón kichiwa yej ayekti iga kikajtewa ken achto moconfiarowaya ipan Cristo.† ¹³ Iwán no nentinemi ipan cada kajli, ay' kiyolmaka te kichiwa, ayéj san iga inón, sino que tapopojtinemi, iwán tatentemowa iwán kijtowa yej ayá' kajasi iga mamoi-ijto. ¹⁴ Nikneki iga yej wewejmikikej mamonamiktikan, makipiakan ipilowan, matakuidarokan ichamej, ijkón awel temalijliáj yej te-ijiya. ¹⁵ Sekin viudamej mopoipolójkeja iwán kitokákeja iyojwi Tzitzimi'.

¹⁶ Si agaj yej kicredojo' Dios kipiá ichan se isiwa-iknin yej mi'ya iwéj, yéj makimakato te kipolowa, amo tokniwan

* 5:9 5:9 O ay' kixima' iwéj. † 5:12 5:12 O: iwán ijkón kichiwa yej ayekti iga kikajtewa ken achto kijtój iga ay' sej monamiktia' iga kitokasan Cristo, iwán ay' keklamikis iga wewejyowis.

yej kicredojtokej Dios makimakatokan, ijkón tokniwan wel kipalewiáj yej ay'ya nokta kipiá a' kipalewiá.

¹⁷ Pastormej yej kiye'ojkuiltiáj tokniwan, kajasi iga pox makiye'itakan, mamó-ita ijkón yej tekipanowaj iga kipowaj iwán tamachtiáj ipan itájtol Dios. ¹⁸ Iga ijkín kijtowa itájtol Dios: “Amo xikten-ilpi toro kua' nemi koya trigo iga iyikxi.” Ijkonsan no: “Yej tekipanowa kajasi iga makixtawakan.”

¹⁹ Amo xiktajtolkuili yej kitelwiá se pastor siga yej tatel-wiá ayá' nemi iwán ome o eyi yej no kinojma-itakej yej mochij. ²⁰ E' siga se pastor kichijto' yej ayekti, xiknonotza iyixtaj toknimej yej kitokaj toTeko iga maye'nemi, iga ijkón sekin no mamajmawikan iga amo makichiwakan yej ayekti. ²¹ Nimitzijliá iyixtaj Dios, iwán iyixtaj Jesucristo iwán iyixtaj iyangelejmej yej Dios kitapejpen, iga xikchiwa kensan nimitzijlij. Kua' titajuzgarowa amo sesan xikye'ita. ²² Kua' tiktapejpena se taga' iga matekipano iga Dios, amo xiktali moma' ipan itzontekon iga ti-oradowa siga ayá' tikmati ken iga nemi. Amo santá' ayá' ye'nemi, iwán kijoskej iga tikye'ita yej kichijto'. Nochipa xikchiwa yej yekti.

²³ Iga ayá' tiye'ijtiyoj, amo á'tisan xikonito, no xikoni alín vino.

²⁴ Ono' sekin yej nesi iga kichijtokej yej ayekti malej iga aya agaj kijuzgarowaj, e' ono' sekin yej aya nesi siga kichijtokej yej ayekti, inón nesiti kua' Dios yawi tajuzgaroti.

²⁵ Ijkonsan no ono' sekin yej nesi iga kichiwaj yej yekti, e' ono' yej kichijto' yej yekti iwán anesi, e' inón ayá' nochipa iyantos.

6

¹ Inochi tekipanowanimej yej esclavojmej,* makirre-

* 6:1 6:1 Xikita glosario “Esclavo”.

spetarokan itekomej, ijkón ayagaj wel kimalijliá Dios niga wel kijoskej iga ayompa titamachtiáj. ² Siga se esclavo kipiá iteko yej kicredojo' Dios, amo iga inón makalimpamati iga no kitoka Dios. Majwa' makiye'chiwili itekipánol iga inón yej nemi kichiwiliá no kitoka Dios iwán makichokili ken iyiknín. Inín xikpowa iwán xitamachti.

Yej kitoka iyojwi Dios mayolpakto ke'ya iga kipiá

³ Siga agaj ayompa tamachtiá, ayéj ken tanextiliá itájtól toTeko Jesucristo, niga ayá' tanextiliá iga matiye'nemikan iyixtaj Dios, ⁴ ininwa' moweyimati iwán akimati nité. Ininwa' itekiy iga mopoxkuesowa iga san kikaki tejté; iwán ompa pewa iga ta-ixita, kuejkuesiwi iwán kuajkuántasya kijtowa iwán ayá' moconfiarowa ipan agaj, ⁵ mokuejkuesowa iwán sekin, pox ayompa tajlamiki wan ayá' kixmati ken nokta tanextiliá itájtól Dios. Iwán inimej yej ayompa tamachtiáj, kejlamikij siga tamachtiáj ipan itájtól Dios wel matatanikan. Iwán inómejpá amo ximotoka. ⁶ Kena, siga se ye'nemi ipan iyojwi Dios, kenkua' kasi yej poxsan patioj, e' mayolpakto ke'ya iga kipiá. ⁷ Iga nité ayá' tikujligakej ipan inín tajli, iwán nité ayá' tikujgaskej kua' timikiskej. ⁸ Siga tikpiáj totzótzol iwán tikpiáj te tikuj, matiyolpaktókanya. ⁹ Iga yej motapialijnekij, akijyowiáj kua' Tzitzimi' kinextiliáj iga makichiwakan yej ayekti, wan wetzij ipan itrampaj. Kiyoltlanaj xeto'nemilis yej tapojpolowa, iwán ipan inón mia' mopoipolowaj. ¹⁰ Kua' se kipoxpiasneki tomin, ómpaya pewa iga kichiwa mia' yej ajayekti. Iwán ono' sekin iga kipoxpiasnekij tomin, kikajtéwaja iyojwi Dios, iwán imatikámejsan pox moknochiwaj.

Amo mamosemaka yej kitoka Cristo

¹¹ E' tej Timoteo yej tiktoka Dios, amo ijkón xikchiwa. Xiye'nemi, xikchiwa ken Dios kineki, ximoconfiaro ipan

Dios, xite-ijknin, amo nimanin xikuesiwi iwán xiyolyamani'. ¹² Xiktanili nochi yej mitztakuiliá iga xikchiwa ken kineki Dios. Amo xiknempolo yej Dios temaka iga nochipa tonoskej íwan. Inón iga nokta mitznotza' Dios iwán mia' mitzkakikej kua' tikijtoj iga tiktokas Cristo. ¹³ Nimitztekimaka iyixtaj Dios yej kimaka vida nochi yej ono', iwán iyixtaj Jesucristo yej kinojma-ijtoj te itekiyo iná' Poncio Pilato, ¹⁴ iga xikchiwa nochi kensan nimitztekimaka iga ni agaj amo mamaltajto iga tej. Ijkón xikchijto este mawiki Jesucristo. ¹⁵ Jesucristo yawi witzeti kua' Dios kijtoj. Dios kichiwas inín, iga yejsan yej Dios yej poxsan kipiá poder. Iwán yéj irrey inochi reymej iwán iTeko nochi yej mandarowa. ¹⁶ Yejsan yej ayí' miki iwán ono' kan taxotalpan kan ayagaj wel kalaki. Ni agaj ayí' kita' niga wel kita. Yéj nochipa mamoweyimatilti wan nochipa marreinaro. Ijkónyawa'.

¹⁷ Xikijli yej motapialiáj ipan inín tajli iga amo mamoweyimatikan, iwán amo mamocofiarokan ipan yej kipiáj iga inonwa' támisan. Majwa' mamocofiarokan ipan Dios yej isato', yej tepoxmaka yej tepolowa iga matiye'onokan. ¹⁸ Xikijlikan iga makichiwakan yej yekti, iga ijkón kichiwaskej, majya sej que iga makipiakán tomin. Iwán kua' agaj kitajtaniliáj tejté inomej yej motapialiáj, mapakikan iga wel kipalewiáj iyikniwan. Iwán yej itatkimej, achi makimajmakakan sekin. ¹⁹ Iga ijkón kipalewiáj iyiknimej, Dios no kipalewij yejemej iwán onoskej nochipa íwan.

Pablo monawatiá wan Timoteo

²⁰ Timoteo, xikchiwa yej Dios mitztekimá'. Amo xiknakasmaka xeto'tájtól yej ayá' mitzpalewiá, amo ximotenkitzkikan iwán inomej yej momachiliáj iga poxsan

1 Timoteo 6:21

12

1 Timoteo 6:21

tajt_olmatij, iga yejemej akimatij nité. ²¹ Sekin yej kitokaj in_ompa tamatilis kikajtewaj iyojwi Dios.

Dios mamitzyolchikawa. Ijkónyawa'.

Itájtōl toTēko ipan mela'tájtōl
Nahuatl, Isthmus-Mecayapan: Itájtōl toTēko ipan mela'tájtōl New
Testament

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 25 Mar
2022

8d5b6a33-8846-5c0f-ae8f-62c94f894f7b